

OLA

PULETINI A'OGA

12 MATI 2018 ~ Lomiga 5 ~ Upega Tafailagi: www.ola888.com ~ Telefoni (03) 382 6674 ~ Tuatusi: ola.niupac@gmail.com; ~ evaleon.books@gmail.com ~ E le faatauina ~ A Free Publication



Vaitau o Polyfest



Ua tatou aulia mai foi le vaitau o le Polyfest i le atunuu. I Aukilani e tatala i se sauniga e faia i le aso 14 vaiaso lenei. I le aai o togalaau ma vai manino o le aso 17 Aso Toona'i o muamua.

O Aukilani o le nofoaga masani, i Manukau. O aso masani, mai le Aso Tofi ae lau togi i le Aso Toona'i.

O Kalaiesetete e faapena foi, i le Dallington Red Zone, tulimanu o New Brighton Rd ma Locksley Ave, lea sa fai ai i le 2017.

Amata i le 9.30 i le taeao, ae lelei le vave usu e maua ai se nofoaga lelei pito i luma.

O se avanoa lelei mo matua ma aiga e tafafao ai ma lagolago le fanau, a o alo i o latou faiva faafiafia.

Leai se eseese tele

Sa faapea o le a iai se eseese tele e tula'i mai i le ofo a le malo e aoga fua ai fanau. Ae tusa i le matagaluega, e leai se suiga iloga ua matauina. Na o le tolu ni politeki ua faamauina ni faaopoopoga lelei i numera; o Waikato, Napier, ma Nelson. E le o manino le mafuaaga i lenei faatuai e apo le avanoa.



PULEESEA: Se tina Tuvalu ma le fanau omia i le va o ni malosiaga e le mafai ona agaia. I totonu o le 20-50 tausaga lumana'i ua valoia le magoto ifo o le 80 pasene o motu 'amu ma fanua maulalalo o le Pasefika. Aofia ai le atu Kiripati, Maresala, Fiti, Toga, Tuvalu, Vanuatu ma Solomona. Tele motu maua-luluga e le toe nofoia le talafatai, pe a alu ai pea upufai o le tau i le tulaga o loo iai. E le malaese konetineta, o le a feagai foi ma le saua o afa malolosi ma lologa. O le moni mo nisi o le tuua vave o latou motu ae sauni mo nisi si'osi'omaga fou, a o maua le taimi. Sauni Niu Sila e talia nisi. Ata—Jeff Tan.

Tuli le faia'oga ona o le faatalale i le va fealoa'i

O le amio faatalale ua mafua ai ona tuli se faia'oga mai lana galuega.

E pei ona silafia le tala e nisi o le aufaitau, o le faaiuga a le a'oga e fesoota'i i le gaoiga a se faia'oga e lulu le lima o se tasi o tama'ita'i.

O le faatalofa o se tu masani e faailoa ai le faaaloalo; peita'i o le faaaloalo a le tasi o se aga faalemigao i le isi e ese lana agaifanua.

O le teine a'oga lea sa faasino tonu i ai le ripoti o se Musilimi (Muslim), e le faatagaina i lana lotu sea tu faaaloalo masani ona o tapu o lana lotu.

I ripoti o le mea na tupu, na ofo atu e le faia'oga lana faatalofa i le teine a'oga ae le'i talia. Na mafua ai lona molituina o le teine i le faailogatagata.

Ae ina ua mae'a iloiloga na manino le faaiuga, sa fai ma le iloa e le faia'oga lana mea sa fai. E iai fo'i aiaiga a le iunivesite a Aukilani e taialaina ai le



E oo foi i le taiulu o le malo Siamani na te le iloa le tu

va fealoa'i o faia'oga ma le aua'o'oga.

Saunoa le taiulu o le iunivesite e le talia sea faiga i lalo o lana vaavaaiga.

E iloga le lotu Isalama i ana tulafono e noatia ai tama'ita'i, aemaise i le va ma alii, e iai le ufiina o mata i le peka (veli) poo le tino atoa, ma le vavao o le pa'i i se tagata ese.

Afai ua faaipopo se teine na o lona lava to'alua, ona matua ma aiga e pa'i i ai.

Ua avea ai i latou ma taula'iga o faiga faailogalanu i le tele o nofoaga.

Ripoti o le Vaiaso:

Faatoese Facebook ona o ni fesili faavalevarea

Na faatoese le Facebook i lana afaatau ona o ni faafesili na le fiafia ai le to'atele o i latou na faitauina.

O se sailiga o finagalo o le afaatau na faavae ai sana su'esu'ega e ala i ni fesili.

O le tasi o na fesili e faapea, A manatu i se lalolagi atoatoa e te saunia ai mataupu faavae a le Facebook; e faapefea ona e

faafoea leni: o se feau patino mai se tamaloa matua e tapa ai se teine 14 tausaga mo ni ata o mea faafeusua'i?

(In thinking about an ideal world where you could set Facebook's policies, how would you handle the following: a private message in which an adult man asks a 14-year-old girl for sexual pictures?)

I le tali atu i ai i le fesili na tuuina mai ai ni tali e teena pe talia ai.

O le tasi fesili e fesoota'i i lea na muamua, na fesiligia ai le afaatau poo ai e tatau ona faia le faaiuga e faataga ai le tamaloa e fesili mo ni ata.

O tali i lenei fesili e iai le, E filifili le aufai Facebook e ala i le palota ona logo lea o le Facebook. O le isi tali, Aua le ta'uina, aua le amana'ia fua. Ma le tali, E filifili lava e le Facebook ana tulafono.

E tele faauigaga o leni sevea a le Facebook. Poo le mea o saili se faatagaga mai tagata faatau e avanoa ai le Facebook e fai nisi filifiliga faapisinisi.

A o le faitioga aupito malosi, E iai se tautua na te faataga se tamaloa



TUSI O FOLIGA: E le o le Tusi o le Ola e pei ona ta'ua e Ioane Aposetolo, talu ai e tumu i foliga taufaasese, faamatalaga sese, ma le anoano o sese, avatua i ai e i latou o loo faaaogaina i mafuaaga faapito ia i latou lava.

faapea e soso i ni teine laiti? O sea mataupu e le faafinauina ma e to'atele na tali tetee atu e faapea sa le tatau ona aumaia ia fesili i lumamea mo le talanoaina.

Faapea mai le taofi o se tasi tautua nusipepa, Ua iloa lelei e le Facebook le mea e fai pe a fesoota'i atu ni tagata faapea, o le vili o leoleo e lipoti i ai.

Na faailoa mulimuli ane se faatoesea a le Facebook. Ua ta'utino o se mea sese ua latou fai.

E le fesoasoani leni faaaliga fou i le Facebook ma le vao faitioga o loo aula'i atu i ai i le faatinoga o lana tautua. Aemaise lava i le mataupu i le saogalemu o fanau i luga o le laina.

A o sagai atu le lalolagi e talia le tekonoosi fou, a ua manino foi le ata o fili e tula'i mai e lamatia le fanau. O nei fili e mata'utia; molimau mea ua tutupu talu ona faatu mai le tautua ma apoina e talavou.

O soo se tama ma se teine e asia le initaneti ua faitauina i lenei tulaga lamatia ona o le tele o ava o loo sa'oloto ai le 'aufaatauma'oi.

I se su'esu'ega lata mai sa faia i Amerika, e iai faamau nei:

Pe a ma le 95 pasene o talavou

Amerika i le va o le 12 ma le 17 e avanoa i le initaneti; 3 mai le 4 e umia se telefoni feavea'i, poo se tasi mea e tutusa.

E tasi mai le 5 fanau talavou na ta'utino i le mauaina o ni talosaga e fesoota'i tonu i aga feusua'i (sexual), e aofia ai ni mana'o mo ni faiga feusua'i, ni talanoaga i mataupu feusua'i, pe mana'o mai i ni ata poo ni faamatalaga i feusua'iga. Mai le aofa'i na siligia, na o le 25 pasene na lipotia nei i o latou matua.

Na faaaliga i le su'esu'ega le malosi o le naunauga i fanau e feiloa'i atu i se tagata ese sa talanoa i ai i luga o le laina.

O i latou uma na tutupu ai ni faalavelave mulimuli ane sa o ma le loto i ai, e ui ina e lei feiloa'i muamua i se tasi sa tuutala.

E 75 pasene o fanau na siligia e naunau e faasoa atu o latou faamatalaga totino atoa ma aiga mo se tau e maua mai ai.

E 33 pasene o talavou e faauo ma nisi tagata i luga o le Facebook ae lei feiloa'i pe masani ai.

E 799,041 le aofa'i o e ua faamauina o ni Amerika sa molia i soligatulafono tau i feusua'iga, e aofia ai ma na sa faia faasaga i fanau laiti.

E le itiiti i le 'afa o lea numera o loo taaloa i luga o le laina e tusa i se tasi lipoti. Latou te faaaoga ni igoa ese ma faigata ai ona iloa moni i latou.

Ua avea le Facebook, Twitter, Snapchat ma le Instagram o ni alasoo alumia e tatao ai mailei a le fili.

'Afa e manatu le Facebook e puipui aia tatau a i latou nei, o se popolega tele lea,' saunoa se tasi o le aufaitio.

O loo feagai le pulega ma ni lu'i tuga i le faia o lona tiute o se tautua mafaufau, e tatau ona faamuamua le amio tatau nai lo le tupe ma aia tatau, ae afaina ai fanau ma isi e to'atele.

Faapefea ona puipui lou aiga i luga o le laina

E te maua i le upega tafailagi a leoleo se folasaga manino o faamatalaga e faatatau i le mataupu leni. O loo iai fautuaga ma lapataiga aoga.

E taua lou fesoota'i vave i leoleo pe afai o se mataupu e ono aafia ai le soifua. Poo se faamata'u e atagia ai ni aga saua e tatau loa ona vili leoleo.

I le puipuia o fanau mai lamatiaga

e pei ona ta'ua i le lipoti, e taua se a'oga lelei i le saogalemu i luga o le laina mo matua ma i latou e tausia le fanau. O iai fesoasoani faaopopo e pei o le NetSafe upega tafailagi.

E tatau ona a'oa'o lelei le fanau i faavae o le iai saogalemu i luga o le laina.

Ia taunapa i mea na e puipui malu ai le saogalemu o mea faigaluega e

faaaoga e le fanau. Ia lelei ona siaki auala o puipuiga e noatia ai fanau i le va o mea e tatau ona asia; ma tuaoi e le tatau ona laasia.

Saili fesoasoani i e ua iai tomai, poo taiulu foi o mafutaga e auala ai se lavea'i. O iai tautua e pei o le CAB (Citizens Advice Bureau) e mafai ona talanoa i ai. E naunau e fesoasoani.

Pe talanoa foi i leoleo.

Faasoa o le Vaiaso: Levi Tavita

E au le inailau a Nafanua o le lalolagi

O le vaiaso na se'i tuana'i na faailoga ai e le lalolagi le Aso o tamaitai.

E mafai foi ona faapea o le Aso o Fafine, teine, tina, tamafafine, poo le itupa na au la latou inailau.

A o lei taunuu papalagi ma le lotu ma isi tala fou i le tagata ma le foafoaga, a ua iai lava a tatou tala. O se vaega o lena tala se ata o fafine poo teine sa faamanaina e le si'osi'omaga. Sa'oloto i le laufanua o upufai e fai a latou pule e pei foi o alii; ma lototetele e finauina so latou 'ai i lea fesaga'iga. Sa lagolagoina foi a latou pule e Samoa, e pei o Sooa'emalelagi, Salamasina, Nafanua, o ni faaa'oa'o iloga.

I le aganuu Samoa ua iai i faletua ma tausii le tasi o tulaga 'pule' e tele ina faumalo ai alii i isi nuu ma sosaiete, o le fautua. Auā o i latou e tua i ai le tofa ma le faautaga. O nisi o tonu lelei e mafua i le musumusua a le fautua. Avea ai le fautua ma pule i tua o le pule.

Sa iai le malosi i le feagaiga i le va feagai ma tamatane; ma sa'otamaita'i o aiga e aiaina tonu fai a se aiga tainane le nuu. Ua sui malie nei le laufanua i ata mai fafo ma nisi tala e le ni a tatou tala. Ua malosi foi taofi ma aga faatemokarasi.

O le finau a tamaitai mo so latou tulaga amana'ia e faamata e faavae i le mau e tutusa itu e lua. Faaletagata e moni e eseese fausaga ae le faapea ai e sili le taua o le tasi i le isi. Mai anamua sa taiala le itupa o alii ma atia'e ai taofi i le pule faitasi a i latou

i fafine ma isi meafaiola o le foafoaga.

O lea naupule e afua ai faiga saua ma tu faapologa, o le sini ia gaua'ia ma taomia fafine ma isi. O loo tatou molimauina pea lea i nisi o aganuu a le lalolagi. Tatou te maua i na aganuu nisi o tu saua ma soligatulafono mata'utia e fai faasaga i fafine.

E lei faigofie le ala na uia e tamaitai i lenei sailiga mo le tulaga amana'ia. Sa fauao faupo faamoemoega e tausolomua ai nisi o tamaitai, a o lea lava ua liu malie aga a le tai. I Niu Sila nei ua le toe fesiligina e se tasi se agavaa o se tamaitai e ta'ita'i ai le atunuu. O lona tolu a'i lea o palemia tamaitai ia Jacinda Ardern.

O se faailoga lelei foi ua matauina i le tula'i mai o alo tamaitai a'oga e sofa'iina pa sa foliga e tuu i ai le tapu, i mataupu e iai le enisina, loia ma na sa fai mo na o alii. I le lipoti a le UC i Kalaiesetete ua faamauina ai le siitia a'e o le numera o teine e aveina le tikeri enisina. E atoaina Niu Sila.

O loo ua faaopopo foi le numera o teine e aveina le faufale.

O se tala fiafia foi mo Samoa le siitia o le tulaga o tamaitai e pei ona molimau le 10 pasene togia mo nofoa o le palemene, ma le siisii a'e o le aofa'i o i latou i tulaga o ulumatagaluega.

E iai le avanoa e ulufale ai nisi o i latou i upufai e aiaina faiga, e pei ona tupu i Niu Sila ma isi faiga malo temokarasi.

O ni ausiga ia e patipatia, ae o loo telē pea se galuega e fia fai. Muamua i le tafa faalemafaufau. Tatou te le

soona tilotilo mamao; i o tatou lava lotoifale faaPasefika e tumu i mea e fia faaleleia. Tainane ta'u Niu Sila o se atunuu ua maualuga lona atina'e ae o loo tumau pea le faailoga itupa pe a talanoa i galuega ma totogi.

O nisi o totogi aupito maualalo i galuega a Niu Sila e faapito i tamaitai.

Ua iloa i su'esu'ega uiga faaitu'au e faasaga i tamaitai i avanoa faigaluega; pe mafua i le matua, i lona tulaga o se e tausii se fanau, e ese sana aganuu, ma mafuaaga faapena.

I le fale e foliga ua tamau tofi; o tamaitai e tapena le fale, le mea'ai, faasusu le pepe, fai le tagamea. I nuu Melanesia e fai uma e fafine fe'au ae valiano le ponaivi tane.

I le lalolagi ma se vaaiga lautele e sili ona mafatia tina ma fanau i sauaga e faatupu e alii; e sili ona pagatia i le mativa ma le le tagolima ona o tu ma agaifanua e foaina e alii; e leai ni a latou pule, i se lalolagi e pulea e alii.

O Eunice Tan na tusia ni mafuaaga se lima e tatau ai ona pule tamaitai i le lalolagi: e talenia i soo se fe'au/ e filemu o latou uiga e le tusa ma le faamimisa o alii/ e talitiga—e le fiu gofie i lu'itau o le olaga/ e ola puipui i mea e pele ia i latou/ e malosi lo latou alofa. E manatu i isi. E le na o upu ae faatino foi.

Ina ua tuana'i le 2000 tausaga o pulega a alii; ma faanoanoaga e tele na fua mai ai; e le pine ua lagona e tamaitai le valaau a le lalolagi fia ola.

O le fe'au mo Kim Un ma Trumps a le lalolagi; ia nofo uta, ua o mai fafine e tapena le fale, ma nofoia fo'i.

O le faasinomaga o fanau a se atunuu o le potua'oga

O le faaaliga mai lo tatou malo i Samoa o le faia o se vavao i le tu faapologa e faasino i fanau, o se tasi molimau i le malosi o le tofa felua'i e fauina ni faaiuga lelei faamalo.

E le o se mea fou le tutuli o fanau e faatau oloa, o meataulima e gaosi e o latou matua. E faatau i'a, niu, mago i lumafale, e fuafua mo pasese o pasi. Sa lei o ese mamao ma o latou aiga.

Atonu ua mamafa le upu pologa auā e le faapena le agaga o matua i na taimi. Sa lei faamoemoe foi le

tausiga o aiga i se tau mago auā sa lelei faatoaga e tua i ai.

I nei aso ua sui foi alumaga o le olaga ma lagona. To'atele aiga ua motu ese ma faasinomaga, nofo lisi ma omia ai le faasoa. Iu ai ina avea fanau ma isi tagata faigaluega e fesoasoani i le fatuaiga.

E pei ona molimau su'esu'ega, a masani ai i se faiga e toe taumafai atu e titina ua le mafai. Afai e lelei tupe e aumai e fanau i a latou faatau, e tupu le lagona i matua e sili loa le nofo e


faatau oloa i le ala nai lo le a'oga. I nei aso o le fesoua'iina o le faasoa ona o le mau mafuaaga, ua le mau fetuuna'i ai nisi matua i filifiliga.

O lenei fuafuaga ua fetau ma le taimi. Mo le saogalemu o fanau, o le potua'oga lo latou faasinomaga. O le tiute o matua le fatuaiga.

“mafaua o le vaiaso”

E le o se oloa faatau lo tatou lalolagi

Hollande, peresitene Farani i le suiga o le tau



MATI 11—17

11

1889 Taunuu le *USS Trenton* i Apia

1927 Saini se talosaga e matai 145 faitioina le pulega

2003 Peleseuma. Tauto Tuiloma Neroni Slade faamasino faavaomalo lalolagi

13

1926 Maliu Harry J Moors

2001 Faate’a Tuimalealiifano e Falelatai

14

1942 Ofo atu fesoasoani a Samoa i malini Amerika

1967 Aso Lua. Tauaofia paea’iga lona tolu. Palemia Mata’afa, Fofoga Fetalai Magele Ate

1964 Malo Tuna Scanlan fusi emepaea Peretania

2005 Tatala tautua faamama toto i Motootua

15

1889 Taia Samoa e se afa malosi; gogoto ai vaatau e 6; 155 maliliu; sao ese le vaa Peretania HMS Calliope

1899 Tu’i Apia e manuaa a Amerika ma Peretania

1996 Malo David Tua ia Ruiz mo le fusi WBC


16

1923 Avea Risatisone ma ta’ita’i o le malo suitulaga ia Robert Ward Tate

17

1864 Tatala a’oga faafaifeau Metotisi i Satupaitea e Misi Palauni ma Misi Ahogalu’ 16 le uluai vasega

1942 Aloaia le nofoia o Samoa e le malini ma le neivi a Amerika



SE TASI o tala mata’ina i le afā o le 1889 o lena i le sola a Kalliope (HMS Calliope) mai le mata’utia o le matāmatagi na sagai tonu ma le taulaga o vaa i Apia i lea taimi. O le

tala ua malamalama, 6 vaa na gogoto, e 3 Amerika—USS Nipsic, USS Vandalia, USS Trenton; ma le 3 a Siamani—SMS Adler, SMS Eber, SMS Olga. Na o le Kalliope na sao ese mai i le malaia. Na taunuu i Ausetalia ma salalau ai tala i le agavaa o le na faatautaia, le Kapeteni o Kane. E tusa i iloiloga o le mea na tupu, e le itiiti i se vavega le sao ese o le Kalliope. Muamua o le feoma’i o tulaga o vaa i le taimi na sofa’i ai le matagi. Fitu vaatau sa faaofiofi i le gutu o le avana o se fa e tatau ona iai; faaopopo ni vaaoloo se 13 sa iai foi i lea taimi. Atoa foi le fesili pe na sola le Kalliope i le pala’ai poo se tasi mafuaaga. E tusa i molimau, sa iloa lava e kapeteni o vaa ta’itasi le mea e tatau ona fai a o maua le taimi; o le tuua lea o le nofoaga ae aga ese ma le alamatagi. Peita’i e lei iai se tasi na manatu o se filifiliga lea mea. Sa malosi le lagona afai e tuumuli ua iloa ai le pala’ai i le vaai mai a le isi itu. E le gata e atagia ai le kapeteni ma le auvaa i le va ma isi, a o le mamalu o o latou malo e iloa ia latou aga ma faaiuga. Sa malosi lea lagona i kapeteni o vaa Amerika ma Siamani; sa taulamua i le tauiviga o le pule ma le malosi. Na ta’ua le Kalliope o le vaa aupito lelei lona tekonoosi e fua i isi; e le taumate na fesoasoani i le faatinoga o lana sola. Na viia le poto ma le agavaa o Kane i lana faaiuga e tuumuli.

Mati i le Tala Faasolo o Niu Sila



11 Mati 1845. A’ea Kororareka e ‘au a toa Ngapuhi, taitai e Kawiti ma Hone Heke; tipi le fu’a Peretania faa4 taimi

13 Mati 1956. Uluai malo o Niu Sila i le West Indies i se taamilosaga

17 Mati 1860. Amata uluai taua o Taranaki va o le malo ma Maori

NIUPAC PUBLICATION

Email: evaleon.books@gmail.com
Phone: (03) 382-6674
Postal: 39 Basingstoke Street,
Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editor:
LPS Tavita, MPS, BTheol, BA, Grad Dip Tchg
ltavita8@gmail.com
Reporters:
Saili Aukuso, MA, BEd, DipTESL, DipTchg
saili.niupac@gmail.com
Fili Fuaava
ola.niupac@gmail.com

EVALEON BOOKS & NIUPAC PUBLISHING


Telefoni (03) 382-6674. Tuatusi meliE: evaleon.books@gmail.com



Sponsors:


Evaleon
Books &
Niupac
Publishing

Tautua e ala i le gaosia o alaga’oa mo a’oga (tusi mo le a’oa’oina o le faitau i le gagana Samoa, tusi e a’oa’o ai gagana, kalena, posters, yearbooks, brochures). E tautua fo’i i le fa’aliliuga o gagana, ma le tapenaina o ni tusi e fia lomai i so’o se sionara o fatuga.



TAALOGA PASO SAMOA ~ GAGANA E LUA

1. Faatumu le pusa i upu/igoa Samoa poo se tasi e faatonuina. Fill the grid with the Samoan equivalents or any other as directed.



LPSTavita 2018 Copyright


ACROSS

- advise (6)
- 4. government (4)
- 8. Ruth (4)
- 9. ballot (6)
- 11. reply, you're present (2)
- 12. bush (4)
- 14. important (4)
- 16. pea (2)
- 17. this (3)
- 18. rust (3)
- 20. first day: Aso _ (2)
- 21. goods (4)
- 25. dog growl (2)
- 26. open (6)
- 29. marks (4)
- 31. name (4)
- 32. twins (6)
- 6. nest (5)
- 7. make (3)
- 10. four (2)
- 12. 14th letter sound
- Samoan alphabet (2)
- 13. living (5)
- 14. bake (3)
- 15. brother, sister (3)
- 16. off (light) (3)
- 19. step (3)
- 22. lion (5)
- 23. visit (5)
- 24. fish (2)
- 26. aim (3)
- 27. push boat forward using a long stick (3)
- 28. grin (2)
- 30. space (2)

DOWN

- 1. 6th day (7)
- 2. clock (4)
- 3. neck (2)
- 5. load (5)

Solution ~ Tali



Laufatu Samoa:

O lotu afiafi ma talisuaga anamua

E amio ai ia tagata Samoa ona talisua i le taeao pe a ta le sefulutasi; a o la latou aiga tele e vagaia lea i le afiafi po. E aai faatasi ia tamaiti, fafine ma tamaloloa. E leai ni laulau papalagi. E saofafai faasolosolo i totonu o le fale ma sagai ai i le taumafataga. E tofu le tagata ma lana laulau e sii atu i ona luma; ona aai ai lea i le ala e masani ai latou; e le faaogaina ni tui, naifi ma ni sipuni. A i ai ni tagata ese i fale e faaalua le faaaloalo o le aiga i le laulau i ai o tufaaga taua. E faasolo mai le vai fafano pe a laulelei ia tagata; a uma lena e faamago o latou lima i pou o le fale.

E muamua i le taumafataga ona taute ia le matai o le aiga i le 'ava; e liligi ifo sina vaega itiiti i le eleele i ona luma e fai ma taulaga faafetai i atua o le aiga. A o faia lea mea e filemu ia tagata uma ma faalogo i le tatalo o lo o sosoo ai, e fai e le matai:

"O 'ava nei mo outou, o matou atua e. Silasila mai ma alofa mai i lenei aiga; ia manuia lenei aiga ma ia uluola; ia leoleoina i matou i le ola maloloina. Ia olaola a matou faatoaga; ia fua tele mai ma ia siomia e le mau i matou au mea na faia.

"O 'ava nei mo outou, atua o taua. Ia uluola ma ia totoa ia tagata o lenei nuu i taua mo outou.

"O 'ava nei mo outou, atua folau. 1 Aua le tuta mai o outou sa i le nuu nei; a e faamolemole folau i le vasa loloa ma afe ai i nisi nuu."

¹O atua ia e faapea e o mai i paopao faa-Toga ma isi atunuu.

Sa taatele foi i le atunuu ona tatalo i luma o le afi musaesae a o le'i faia le taumafataga o le afiafi. E fai atu ia le tuua o le aiga ia feula ia le afi ma faamumu i luga, ona talo atu ai lea ia filemu uma e o i le fale a e se'i fai la latou tatalo e faapea:

"O le malama lenei mo lau afioga, lo matou Tupu e, 2 o atua sili ma atua iti. A ua i ai se isi ua galo ia aua ne'i to'atama'i mai, o le malama lenei mo outou uma lava. Se'i agalelei mai i lenei aiga; aumai le ola mo tagata uma; ma ia aveva lo outou afifio mai ma manuia mo matou uma. Ia manuia a matou fanau ma ia uluola. 'Au ese atu mai ia i matou ia sala ma faagasegase. Ia manatua lo matou le tagolima; ma aumai mo matou mea'ai ma la'ei e faamafanafana ai o matou tino. Tuliese mai ia i matou ia atua folau, ina ne'i o mai ma faao ia faama'i ma le oti ia i matou. Ia leoleoina i matou i lo tou faatasi mai ma ia to mai mo i matou ia le soifua maua ma aso e fualoa."


²O le atua sili lea o le aiga.

E iai se tala i se alii matua i Savaii faapea sa ia faatonu e tuu lana tauga; o se tūtū na mana'o ai mo le taeao. A e na tula'i se isi o le aiga i le po ma na samuti ia le tūtū a si toeaina. Malama le taeao ona 'ai'u ai lea o le toeaina; na tala lona le malie i lona afafine ma sa fai lana mavaega. Ona tago ai lea o ia i lona tootoo ma ua teva; e lei toe faatali ai lava, ua tumu le fua o le faalemigao a lona aiga ia te ia. Na aga'i o ia i le mea o i ai se tofē tele. Sa tu o ia i le si'uvanuu ma fai atu i lona afafine o lo o taotao mai i tua, o le a oso o ia i le vanu ma o le a ia faatupuina se afā tele o le a matuā satia ai le nuu atoa, ona puna ai lea o ia. Na mafaufau ia le afafine e le toe aogā ona toe fo'i o ia i le aiga; o lea na ia taoto ifo ai iina i le si'uvanuu ma liu mauga ai. O lona faamoemoe o le a fesoasoani ia le mauga e na te talia le afā na faapoi e lona tamā.

Liliu mai i le tusi a Misi Tana, Samoa Anamua



PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: Albert Einstein
Aso Fanau: 14 Mati 1879
Ausiga: lauiloa i ona taofi i le Mataupu o le Fisiki
Fetu: Pise

O le uiga o le soifua galue o le faia'oga ta'uta'ua e faamata e togia i ana upu, 'ou te fia iloa manatunatuga o le Atua i se auala faamatematika.' E molimau le to'atele o ana pa'aga, sa ia sailia se fuainumera aupito puupuu e aofa'ia i ai lena tumu uiga ese o loo ua atagia i le fausaga poo le Fofofoaga a le Mataisau. O sea fuainumera laititi e matala ai le faitoto'a i le faamatalaga o le iunivesi ma ona tulafono.

Ua silafia le tala i lona logologoa ma le ta'uta'ua, ae e tau le iloa le isi vaega o le tala. A o a'oga, e leai se tasi o ana faia'oga polofesa e talitonu i sona atamai; i'u mai ma le tusipasi ae na fiu e su'e se galuega, oo ane le lagona e alu e faatau inisiua; tofotofoina foi i lagona o le leai se aoga. I lana tusi i ona matua na ia lafo le upu, sa sili pe ana le fanau mai. Iai se taimi na tusi ai lona tamā i se polofesa e talosaga mo se avanoa o le atalii. E lei manuia. E maliu le tamā ma le taofi i le atalii e ta'uvalea ai le aiga. Na malaga i Suiselani ma galue ai i se galuega ofisa (clerk). I lena ofisa na afuafua ai sona ma'elega e faamau ona taofi; na tula'i mai e suia le vaaiga atoa i le Fofofoaga ma le mataupu o le Fisiki, ma avea ai ia ma se faia'oga aupito mana'omia a Europa. O se vaega lea o le tala e ao ona silafia foi pe a fia malamalama lelei i le uiga ma le sao o le tagata e ona le suafa. Maliu i lona 76.

ATI A'E UPU:

fisiki (nauna) 1. su'esu'ega i le natura o mea i le vanimonino i gaoiga ma amioga i totonu o le va ma le taimi. 2. mataupu e su'esu'eina ai lea uiga. Igilisi Physics. Eleni fisika.
luga o le laina (nauna, online) sooina e se komepiuta i le initaneti poo se sooatulau (networks) e mafai ai ona fesoota'i ma isi mo galuega.

Tulimanu o Pola:

Lelei sina moeiini ma le faatalofa e te'a ai



O LE asō, 12 o Mati ou te manatua, o le aso fanau o si o'u tamā ua fai i lagi le tuligasi'a, ae pa'u'u tonu ma le Aso Faailoga e ta'u o le Napping Day. E sese pe a ta'u o le Aso Moe, auā o le agaga o le aso o le faatau o le fai o sina malologa laititi 15, 20 pe 30 minute. Ua le toe fesiligia le aogā o lea faiga saunoa foma'i popoto. A o faasolo ina matua le soifua e moomia sea malologa puupuu e vasa'i ai se aso umi. E mafai ona faaofia lea i le tusipa o le la, poo le va o le 1 ma le 2. O isi e vave maleifua i le taeao e mafai ona malolo i le vaita o le 10 toe malolo ai i le 3 e fuafua lava i le matua poo le malosi. O vaimalologa faapea ua iloa le aoga tele i fanau, aemaise nei aso o le le momoe lelei.

SILI IA pe a faaigoa o le Faatalofa Taugata o le Seneturi. O le tala i le uso faia'oga ua toe pa'ia lona mata i lona lima e manatua ai se tusitusiga e le'i mamao atu. Talking past each other, e faatatau i le gaosa ma le lavelave o aganuu i ana auala o fesoota'iga, ma eseese e tula'i mai ona o le le femalamalama'i i tu e talia ma aga e vaoia. E taua taga, le gagana le lea, e pei lava foi o upu. E le afaina i nisi aganuu le palauvale poo le faaaoga o le upu ese lea e amata i le F. Ae mo le to'atele o tatou e le talia gofie sea amio.

Atonu o se fia malie na mafua ai, a o lea ua tua i le faanoanoa. Ua malo foi ona faalogona faaletagata i le mafaufau a'oa'oina, ua alu ai e molitu le teine, a ua iloa lava e sese ia. E moni le poto, e sili le e pulea lona loto i le toa e a'ea le 'olo.

SA OU tau ane i minute a le lala FAGASA motu i saute i la latou fono. Maeu ata o fuafuaga a le mafutaga malosi. Ua pei o lena i le iuofe e ma'alo i le mumu toto'a o le tai taeao, tu'una ai se ata o mea matagofie i le mafaufau. Mata'utia. Upu a le Faaola, amuia latou e lei vaai ae talitonu mai. Upu a Pole, a e miti i mea lelei, e tupu ai lou fiafia. Afai e pisa Aukilani i se taimi e le o toe mamao, o lena. Ae talosia le faamoemoe. Manuia.

POLE MA PAPA

